

Na osnovu člana 21. i 22. stav (2) Zakona Bosne i Hercegovine o izvršenju krivičnih sankcija, pritvora i drugih mjera – Prečišćeni tekst („Službeni glasnik BiH“, broj 12/10), ministar pravde Bosne i Hercegovine, donosi

**PRAVILNIK  
O MJERILIMA I NAČINU UTVRĐIVANJA ZDRAVSTVENE SPOSOBNOSTI  
OVLAŠTENIH ZAVODSKIH SLUŽBENIKA**

**Član 1.**

**(Predmet)**

Ovim Pravilnikom propisuju se mjerila i način utvrđivanja posebne duševne i fizičke sposobnosti (u daljem tekstu: zdravstvena sposobnost) koju moraju ispunjavati:

- a) kandidati za prijem na poslove u Zavodu za izvršenje krivičnih sankcija, pritvora i drugih mjera Bosne i Hercegovine (u daljem tekstu: Zavod);
- b) ovlašteni zavodski službenici (u daljem tekstu: Zavodski službenici).

**Član 2.**

**(Opća obaveza zavodskih službenika o čuvanju zdravlja u Zavodu)**

Zavodski službenici su u vršenju službe dužni da čuvaju svoje zdravlje i zdravlje drugih lica u Zavodu i da se pridržavaju savremenih higijenskih normi i propisanih medicinskih, sanitarnih i drugih mjera i uputstava, kao i pohađanja redovnih obuka iz oblasti pružanja prve medicinske ili druge pomoći, u cilju održavanja zahtjevane lične i kolektivne zdravstvene higijene.

**Član 3.**

**(Ustanova za ocjenu zdravstvene sposobnosti)**

Zdravstvene preglede koji prethode ocjeni i mišljenju o zdravstvenoj sposobnosti, u pravilu, obavlja ovlaštena zdravstvena ustanova (u daljem tekstu: zdravstvena ustanova) s kojom Ministarstvo pravde Bosne i Hercegovine (u daljem tekstu: Ministarstvo pravde) sklapa ugovor u skladu sa propisima o javnim nabavkama.

**Član 4.**

**(Mjerila za utvrđivanje zdravstvene sposobnosti)**

(1) Mjerila zdravstvene sposobnosti za lica iz člana (1) ovog Pravilnika koja čine uslov za obavljanje poslova zavodskog službenika, zdravstvena ustanova utvrđuje na osnovu ljekarskog-zdravstvenog pregleda:

- laboratorijski nalazi SE, KKS, ŠUK, urin, urea, kreatinin, holesterol, trigliceridi, transaminaze, bilirubin u krvi
- rtg pluća (na osnovu mišljenja ljekara specijalista - po potrebi)
- okulistički pregled
- ginekološki pregled (za žene)
- neuropsihijatrijski pregled
- psihološko testiranje
- internistički pregled EKG
- kardiološki pregled sa UZ srca
- ORL pregled sa audiometrijom
- ocjena radne sposobnosti sa zaključnim mišljenjem specijaliste medicine rada
- izvještaj o izvršenim pregledima

(2) Zdravstvena sposobnost kandidata za prijem na poslove u Zavodu utvrđuje se na prethodnom zdravstvenom pregledu po mjerilima iz stava (1) ovog člana.

(2) Zdravstvena sposobnost zavodskih službenika na sistematskom kontrolnom pregledu, te vanrednom kontrolnom pregledu utvrđuje se po mjerilima iz stava (1) ovog člana prilagođena prirodnom opadanju pojedinih funkcija u skladu sa životnom dobi i radnim stažom zavodskog službenika.

#### **Član 5.**

##### **(Dodatne pretrage i pregledi)**

Osim pregleda iz člana 4. stav (1), a u zavisnosti o indikacijama, zdravstvena ustanova može preporučiti obavljanje dodatnih pretraga i pregleda i to najčešće radi: psihijatrijskog, psihološkog, internističkog, fizijatrijskog, ginekološkog ili neurološkog pregleda, odnosno obavljanja RTG pretrage, ergometrije, ultrazvučne pretrage određenih organa, EEG pretrage, izuzimanja vlasi i vještačenja istih radi utvrđivanja prisutnosti droge, te drugih nedozvoljenih psihoaktivnih supstanci u organizmu i ostalo.

#### **Član 6.**

##### **(Ocjena zdravstvene sposobnosti)**

(1) Zdravstvenu sposobnost lica iz člana (1) ovog Pravilnika, na osnovu obrade koju je obavila, zdravstvena ustanova ocjenjuje ocjenom “sposoban” ili “nesposoban”.

(2) Zdravstvena ustanova može dati ocjenu “potrebno dalje liječenje” za zavodskog službenika za kojeg se utvrdi da nije moguće donijeti ocjenu iz stava (1) ovog člana, zbog liječenja koje je u toku i za zavodskog službenika za kojeg se utvrdi da je potrebno započeti sa liječenjem.

(3) Ocjena se dostavlja organizacionoj jedinici nadležnoj za kadrovske poslove Ministarstva pravde.

(4) Ocjena iz stava (1) i (2) ovog člana je konačna.

#### **Član 7.**

##### **(Rokovi)**

(1) Rok za obavljanje sistematskog kontrolnog pregleda za zavodske službenike je jedna godina.

(2) Rok iz stava (1) ovog člana počinje teći od dana izdavanja posljednje isprave o zdravstvenoj sposobnosti koju izdaje nadležna zdravstvena ustanova.

#### **Član 8.**

##### **(Organizacija obavljanja zdravstvenih pregleda)**

(1) Zavodski službenici dužni su pristupiti sistematskom kontrolnom pregledu u rokovima utvrđenim članom (7) ovog Pravilnika, kao i vanrednom kontrolnom pregledu kada to zatraži nadležni rukovodilac ili nadležni ljekar primarne zdravstvene zaštite.

(2) Uprava Zavoda u saradnji s nadležnom medicinskom službom ili organom, treba da prati zdravstveno stanje zavodskih službenika, da oboljele blagovremeno upućuje ljekaru i preduzima potrebne mjere za spriječavanje zaraznih i drugih oboljenja, da preduzima

protivepidemijske mjere, kao i da sprječava povrede za vrijeme obuke i neposrednog rada koji se obavlja u skladu sa datim zakonskim ovlaštenjima.

(3) Organizaciju provođenja, kontrolu i evidenciju pravovremenog obavljanja zdravstvenih pregleda obavlja komandir Odjeljenja zavodske policije na državnom nivou po nalogu upravnika Zavoda a u saglasnosti sa Sektorom nadležnim za kadrovske poslove.

#### **Član 9.**

##### **(Posljedice negativne ocjene)**

(1) Zdravstvena ustanova će ocijeniti nesposobnim zavodskog službenika kod kojeg utvrdi bolest, stanje, povredu ili njihovu posljedicu, odnosno fizičku manu koja je prepreka za uspješno obavljanje konkretnih poslova u Zavodu ili kada postoji kombinacija više kontraindikacija koje ukupno čine prepreku za rad na povjerenim poslovima u Zavodu.

(2) U slučajevima iz stava (1) ovog člana ministar pravde imenuje tročlanu Komisiju koja će ispitati mogućnost raspoređivanja zavodskog službenika na druge poslove u okviru Zavoda i Ministarstva pravde, a u skladu sa njegovim zdravstvenim i drugim sposobnostima.

#### **Član 10.**

##### **(Stupanje na snagu)**

Ovaj Pravilnik stupa na snagu osmog dana od dana objavljivanja u „Službenom glasniku Bosne i Hercegovine“.

Broj: 06-02-3-158/11

Sarajevo, 05.01.2011. godine

**MINISTAR**

**Bariša Čolak**